



Un hende hustu ta
haña hopi sla, ma
Señor ta salb'é di tur
esei. (Salmo 34:19"

EDITOR:
Bonaire Communication Services N.V.

Djárason 15 mart 2023

Preis:\$1.00

BONEIRU TA VOTA

Limpiesa bou di laman



E wikènt ku a pasa tabatin e promé limpiesa bou di laman pa a e aña akí. Komo parti di Bon Doet, a organisá un limpiesa bou di Waf Chiku Mercelina i a kolektá un kantidat grandi di liña di piska i un total di 45 kilo di glas.

MANTENE BO
VEHIKULO OF
EKIPO DEN
KONDISHON
KU PIESANAN
KUMPRÁ NA NAPA



xerox™



OBERSI
ELECTRONICS
BONAIRE

CHANGAN AUTO



CS15

f /dabboussimotors





Ku hopi tristesa nos a tuma nota di fayesimentu di

Sr. Jan Kloos

**Presidente di Hunta di Komisario di BIA N.V.
2011 - 2014**

Hunta di komisario, gerensia, staf i personal di Bonaire International Airport NV, ta gradisi Sr. Jan Kloos pa tur lokual ku e la nifiká pa nos aeropuerto i ta deseá su Sra. esposa, yunan i demas famia, nos mas sinsero kondolensia i ku nos bon Dios duna nan forsa pa karga ku i prosesa e pèrdida aki.

Dag jij

A fayesé inesperá nos kasá, tata i welo

Johannes 'Jan' C. Kloos

"Officier in de Orde van Oranje Nassau"

*Schiedam 03-12-1939 † Bonaire 07-03-2023

Jan no tabata klá pa bai ainda. E tabata yen di plan pa futuro (E kier a hasi hopi kos ainda). Nos lo sinti su falta hopi

Margreth

Patricia en Ren

Kyle en Sanne

Heather en Patriek

Lorraine en Peter

Akto di despedida ta tuma lugá djarason 15 mart di 1' or pa 3.30 na misa la Birgen di Coromoto Kaya Korona 126, Antriol.

Kremashon ta tuma lugá den seno familiar.

Na lugá di flor Jan ta preferá un donashon na "VOEDSELBANK BONAIRE" Tin un buzón disponible na misa pa hasi donashon òf por hasi donashon dirèkt na: Johannes C. Kloos e/o Margaretha Kloos-Mulder MCB 10272701

Dag jij

Onverwachts is overleden mijn echtgenoot, vader en opa,

Johannes 'Jan' C. Kloos

Officier in de Orde van Oranje Nassau

Schiedam

Bonaire

*03 december 1939 † 07 maart 2023

Jan was nog niet klaar met leven en zat nog vol toekomstplannen. We zullen hem enorm missen.

Margreth

Patricia en Ren

Kyle en Sanne

Heather en Patriek

Lorraine en Peter

De condoleance en gebedsdienst zullen plaatsvinden op woensdag 15 maart 2023 tussen 13.00 uur en 15.30 uur in La Birgen di Coromoto kerk, Kaya Korona 126, Antriol. Aansluitend zal de crematie in besloten kring plaatsvinden.

Op een later tijdstip wordt in Nederland nog een afscheid georganiseerd.

Jan wilde geen bloemen maar eventueel een donatie aan de voedselbank Bonaire, die hij een warm hart toedroeg. Dit kan ter plekke tijdens de uitvaart in een box, of via: Mw M.O.F Kloos e/o Hr J.C Kloos NL37ING0000272215

Pa info i komunikado den

Extra/BONERIANO

Redakshon: extrabon@gmail.com

Aviso mail: avisobon@gmail.com

Proyekto di reforestashon Fofoti

KRALENDIJK – Ta bata un dushi wikènt di Bon Doet ku un reto grandi. Un total di 25 boluntario a yuda Mangrove Maniacs ku e proyekto di reforestashon Fofoti, mehorando e sistema di roi, pone sistema di drep i planta mata.

E reforestashon na Fofoti lo yuda redusí eroshon i prevení sedimentu pa bai resultá den e área di pal'i mangel.

Den e kurá algun tempu pasá a planta mas di 500 palu di boton. E palunan yòn akí ketu bai mester di

mas kuido. E sistema di drep lo hasi esaki mas efisiente.

Tambe e boluntarionan a planta 15 palu di mansaliña ku ta krese lihé. Esaki ta un palu lokal ku ta krese bon den ambiente di salu.



Caribisch Nederland
Belastingdienst

BCN ta buska:

DEURWAARDER

Abo ta un persona ku gusta traha den tim, ku ta buska un trabou ku desafío i variá i abo kier kontribuí na propagá kumplimentu di parti di siudadano- i kompanianan? Reakshoná awor!

Mas informashon?

Bishitá www.rijksdienstcn.com/vakatura

Fecha di klousura: 29 di mart 2023

BONEIRU TA VOTA

KRALENDIJK- Awe, 15 di mart pueblo di Boneiru ta vota den e elekshon di Konseho Insular i elekshon di Kolegio Elektoral. Durante elekshon un votadó ta determiná kua partido òf partidonan ta tuma asien-to den Konseho Insular. Hasiendo uso di e derechi aki bo tin influensia riba toma di desishon di Entidat

Públiko Boneiru (EPB) pa e próksimo kuater aña.

Un total di 16312 siudadano por vota pa Konseho Insular i 14620 pa Kolegio Elektoral.

Seis partido lo partisipá na e elekshon di Konseho Insular, Union Patriótiko Boneriano (UPB), Movementu di Pueblo Boneriano (MPB), M21, Union Rev-

olushon Boneriano (URB), 1 Union pa Pueblo, Partido Demokrátiko.

Remarkabel ta ku no tin masha informashon tokante tur ku a postulá su mes pa elekshon di Kolegio Elektoral.

Por vota for di mitar di 8'or di mainta te 9'or di anochi na 12 urna elektoral. Despues ku tur urna sera,

ta kuminsá konta voto. Ta hasi konteo preliminar pa partido. Esaki ta nifiká ku ta konta voto pa sa kua partido a sali ganadó. Mayan, 16 di mart ta konta votonan personal. Motibu di esaki ta pa evitá ku konteo ta bai dura muchu largu i tambe e rísiko pa kometé fayó durante konteo. Ministerio di Asuntunan Interior i Relashon di Reino di Den Haag, a invitá Organization of American States (OAS) pa opservá e elekshonnan. E ophetivo prinsipal di e mishon opservashon ta pa proveé feedback di e elekshonnan den forma di un rapòrt ku mester inklui e opservashonnan i rekomen-dashon tokante e elekshonnan riba e tres islanan.

Kampaña polítiko

Básikamente e kampaña polítiko a dura 2 siman. Un periodo basta intensivo ku debatenan krítiko. Partidonan a hasi uso di medianan sosial i tambe a aserká e siudadano na su kas. Por a nota ku ainda tin basta apresio pa sistema ku partidonan ta dreña den bario i skucha i splika e votadó. Si resumé e periodo aki mester bisa ku tabatin hopi diskushon riba Facebook i algun medionan di komunikashon. Tambe por a nota basta atake personal i tiramentu di shushi kontra otro.

BONERIANO a nota ku apesar di un kampaña intensivo ainda tin hende ku ta duda pa kua partido nan ta bai vota. Resultado di elekshon lo demonstrá si e

grupo di votadó ku ta zueif aki, ta grandi.

Vòlmagt

Un votadó por apoderá un otro votadó pa bai vota p'e. E persona ku haña apoderashon por vota ku e vòlmagt solamente na mes momentu ku e ta depositá su mes voto. Den e lei elektoral tin entre otro reglá ku no ta permití pa haña un apoderashon di un persona ku derechi di vota dor di un regalo òf un promesa. Bendementu di bo apoderashon tampoko ta permití. Kada echo tin un kastigu di prizòn di seis (6) luna mará na dje. Segun e lei elektoral, reklutá apoderashon tambe ta un echo kastigabel. Pues, maske no tin un rekompensa pa esaki, tòg no ta permití pa aserká personanan ku derechi di vota pa haña nan apoderashon.

No vota

Durante kampaña polítiko Robby Beukenboom, lider di e partido polítiko Frente Sosial Progresivo (FSP) i James Finies di Nos ke Boneiru Bek (FNKK) a hasi un yamada na pueblo di Boneiru pa no bai vota. Nan a urgi votadónan pa no hasi uso di nan derechi ku e meta pa manda un señal fuerte pa tantu gobièrnu di Boneiru komo Den Haag.

Konsekuentemente Gezaghèber Edison Rijna básikamente a supliká pueblo pa salbaguardiá demokrasia i hasi uso di nan derechi. Pues pa tur personanan ku derecho di voto bai vota.

4 tep ku lo por yuda

Difikultat ku drumimentu di bo yu?

Bo yunan ta lantá wowo hanchu habrí ora nan mester ta drumi? E senario aki mayoria biaha ta kousa miseria e siguiente mainta, pasobra tur hende ta kansá. Si bo kier tin ménos difikultat ku e drumimentu di bo yu(nan), lesa e siguiente tepnan pa wak kiko bo por implementá na kas ku por hasi un kambio.

Rutina; muchanan ta benefisiá di un rutina promé ku nan bai drumi. Esaki kiermen ku nan mester bai drumi e mesun ora tur anochi. Yuda bo yu relahá un ora promé ku orario ku e tin ku bai drumi. Paga algun lus den kas i krea un atmósfera kalmu. Kosnan ku por yuda bo yunan prepará pa bai drumi ta músika kalmu, lesa buki, brasa i karisiá nan.

Ehersisio; durante dia si bo yu(nan) tin hopi energia ainda, bo lo ripará esaki. Nan lo ta

kore rònt di kas, miéntras ku bo kier pa nan bai drumi. Pèrkurá ku bo yu(nan) ta haña sufisiente oportunidat pa energia durante dia. Enkurashá nan pa hunga pafó, muchanan ta move mas hopi ora nan tin mas espasio. Si esaki no ta posibel na kas, por bai un parke. Tambe por inskribí nan den un deporte ku ta rekerí hopi energia. Si no ta posibel pa bai pafó, hasi aktividatnan den kas ku ta rekerí hopi energia. Por ehèmpel un "dance party", bulamentu, Zumba riba YouTube, etc. Tur e aktividatnan aki no ta solamente bon pa saka energia, pero tambe bon pa nan desaroyo. Banda di esaki e ta un oportunidat unda abo komo mayor por pasa tempu ku bo yu(nan).

Rekompensa; no rekompensá nan pa ta lantá miéntras nan mester ta drumi. Tur mayor kier ta un mayor ku ta mostra nan yu(nan) amor ora nan no por drumi. Sinembargo, bo no kier enkurashá nan pa keda lantá

dor di inkonsientemente rekompensá nan kada biaha ku nan lanta. No duna bo yunan algu dushi pa kome òf bebe si nan lanta. No laga nan kuminsá hunga, miéntras ku e yu mester ta drumí kaba. Ora nan lanta, guia nan bèk na nan kamber, brasa nan i bisa nan ta ora di bai drumi.

Reglanan konsistente; sea konsistente den bo reglanan. No bisa bo yu(nan) pa bai drumi na un sierto orario un anochi pero e siguiente anochi bo ta laga nan keda lanta mas largu sin niun motibu. Muchanan lo no tuma e reglanan na serio i por confundí. Uzando rekompensa positivo semper ta mas mihó ku konsekuensianan negativo. Un rekompensa positivo por ta ku bo por laga bo yunan keda lantá un poko mas lat riba djabièrnè i djasabra, si nan a bai drumi na tempu durante e siman.

Donashon na SKAL

KRALENDIJK -- Djaluna mainta e artista, Fred Ros, a hasi entrega di su 'Trippin Tuna', konosí tambe komo 'The Tuna', na SKAL. Na e okashon akí Felix Thomas di SKAL, Timoteo Silberie di Edukashon i Bienestar i diputado Elvis Tjin Asjoe di Kultura, tabata presente.

E obra di arte ta un miniatura di e buní mas gran-

di, ku na fin di e aña akí nan lo trese Boneiru. Ku su opheto di arte, un buní di stal di kasi 5 meter, Ros ke invitá hendenan pa opservá bida bou di laman. Tambe e ke krea un eksperensia i konsiensia nobo tokante bida den laman.

E buní, ku aktualmente e artista Ron Moret ku ta hasi uso di stal ta trahando na Hulanda, despues di un

tour, lo bin kas bèk, esta Boneiru.

E piská lo haña un lugá bou di awa i lo pone diferente kámara na dje, di manera ku riba awa tambe hende por eksperensia loka ta pasa bou di awa.

Ros ta spera ku a base di esaki, ta surgi un diálogo tokante konsientisashon i e relashon entre hende i naturalesa.



Programanan di Bonaire.tv

TELBO kanal 70
Flamingo TV kanal 23

Djáragon 15 mart 2023

12.00 Herensia Korsou:
13.00 Aki Bonaire:
14.00 Herensia:
15.00 BAPA:

Charles do Rego
George 'Kultura' Thodé
Philip 'Lipo' Elhage
Elba Mercera-Beaumont

16.00 Herensia Korsou:
17.00 Aki Bonaire:

Saida Hernandez-Augustina
Classical Music Board
Benefietconcert 2019
Gilbert (Boy) Wout

18.30 Herensia Korsou:

20.00 Aktualidat:
21.00 Programa Politiko:
22.00 Herensia Korsou:
23.00 Programa Politiko:

Robby Beukenboom
MPB ta Informa Episodio 21
Carl(os) Smith
MPB

Tur mèrdia 12'or ta kuminsá un programashon nobo di 4 ora.
E programashon aki ta ripití pa 24:00.

Eli Deli Cafe B.V.

ta buska

- 1 Bakker 40 ora pa siman

-idioma: spano, ingles i papiamentu.

-min 3 aña di eksperensia, edat min 25 - max 35

Pa mas info yama telefon **795 4709**

BONAIRE MARMER N.V.

ta buska

- 3 metaalbewerker

-mester por papia papiamentu/portuges i spaño

Inf. tel. nr **785-7491 persona di**

kontakto Jorge Goncalves Ferreira

ALABANSA MIENTRAS MI TA SPERA KONTESTA

"Alabá SEÑOR! Duna gradisimentu na SEÑOR, pasobra E ta bon;"

Salmo 106:1(BS)

Bo a yega di para ketu i pensa; Kon Dios tabata bon ku mi? Hopi bes nos tin e mal kustumber di yora pa loka nos no tin en bes di gradisí Dios pa loka ku sí nos tin. Òf nos ta keha pa loka nos tin i ta deseá di tin loka otro tin. Si ami na e momentonan akí, djis sinta i wak rònt di mi, mi por skirbi lista largu sin kaba, di tur e bendishonnan ku tin den mi bida, i esei ta esnan ku mi por mira. I ainda falta esnan ku mi ta den orashon pa nan.

Kisas awe bo kurason ta mas yen di preokupashon te ku no tin espasio pa yama Dios danki. Kisas bo kurason ta kargá pa:

*Un trabou ku bo tin mester.

*Un gastu ku a sali diripiente pa atendé.

*Pa restorashon di un relashon ku ta hasi hopi doló.

*Pa un problema familiar.

*Pa un malesa ku ta molestia bo.

Awe e Palabra di Dios ta bisa nos pa: "Alabá SEÑOR! Duna gradisimentu na SEÑOR, pasobra E ta bon." Maske nos no ta mira salida; Alabá Señor i dun'E gradisimentu. Ami ta skohe pa alab'É, mientrastantu mi ta spera riba Dios Su kontesta di orashon. Alabansa i gratitut ta yuda mi kambia mi "focus". Enbes di pensa: "Mi no tin esaki, òf ta dikon Dios no a kontestá mi riba esaya", mi por keda kòrda ku Dios ta sèmpre FIEL! E tin e solushon pa mi situashon.

Pakiko abo ta alabá Dios p'e awe?

Diannenara Mercera

Produkshon PGM

“Misa mester tende i risibí”

KRALENDIJK – “Mi tin e sintimentu ku mi mensahe komo Papa lo ta kòrtiku. Kuater òf sinku aña, òf te asta solamente dos òf tres.” Esaki Papa a bisa den un entrevista na 2015.

E kardinal argentino, Jorge Mario Bergoglio, tabatin 76 aña tempu ku a nombr’é komo Papia dia 13 di mart 2013. Riba plèchi Sint-Pieters yen di hende, kasi niun hende tabata sa ken e ta. E tabata un deskonosí.

Un kardinal reformista, e kontra kandidato importante di Joseph Ratzinger, durante e kongreso di 2005, ya hopi lihé a tira sèrbètè den rin momentu ku el a komprondé ku e no ta bai alkansá e kantidat di voto nesario. Ocho aña despues despues ku bahada di Ratzinger esaki a logra, pues komo Papa tabatin e nòmber Benedictus XVI.

Misa komo hospital di guerra

Misa Katóliko Romano tabata den un krísis. Skandal rònt di mal uso seksual tabata na òrdu di dia. Maneho i finansieramente



tabata un káos. E papa nobo tabata pará dilanti un tarea enorme, e reformashon di e gremio romano, e aparato di maneho na Roma, e splikashon di Banko Vatikano i rekuperashon dor di mal uso di e imágen di misa seriamente dañá.

Papa Francisco a kuminsá enérgiko ku su tarea, pero pa sorpresa di hopi el a hasi ainda mas. El a skohe un nòmber ku ta pará komo símbolo pa simpleza i pobresa. “Mi ke un misa pa e pobernan,” Papia a bisa.

Franciscus van Assisi tabata un hóben kende den siglo 13 ya a distansiá for di su rikesa mundial pa dediká su mes na evangelisashon i kuido di pobernan. El a dirigí su misa komo un hospital di guerra. El a habri porta

hanchu i ke pa e pastornan sali i yuda hendenan den nesesidat. Mester a bini ku kambio di mentalidat. Pa hendenan ku konfiansa ta sigui e siñansa pa un komunidat habrí ku ta tende i risibí tur hende.

“Ken mi ta pa husga”

“Ken mi ta pa husga sí un pastor homoseksual, Señor ta buska i ta di buena fe.” Tabata palabranan ku hopi impakto. E aktitut habrí di e papa a kondusí prinsipalmente den wèst na speransa grandi tokante reformashon ku e tabata ke implementá, aseptashon di homoseksual, diakono femenino i ken sa te asta pastor muhé.

Pero dies aña despues parse ku e speransanan ta inhustu i te asta irealístiko.

Siñansa i tradishon no asina asina ta pa tira muchu leu. A pone pasonan chikitu. Pa lei kasamentu di parehanan katóliko divorsia tabata por, ku guia, atrobe pa risibí komunión. Grásias na nombramentu di Franciscus awor un kuart di e personal di e gremio romano ta hende muhé.

Pero Franciscus no a kambia niun lèter na e doktrina, solamente na e lugá di e doktrina mester tin, hopi ménos sentral ku por ehèmpel amor pa otro práktiko i misericòrdia. El a hasi e tema di homoseksual dentro di misa diskutibel. Poko poko e influensia di laiko i hende muhé ta krese.

Guera kontra klerikalismo

E malu mas grandi dentro di misa ta klerikalismo. Pastornan, obispanan i kardinalnan ku ta pone nan mes riba un pedestal. Kleronan ku ta biba será den un mundu i ta sinti nan sinta intachabel. Un kultura di klero den kua e anhelo pa poder, yalusí i redashi, ta haltu pa nan. Den kua un kultura di surdu ta dominá.

Franciscus a trata di kambia e mentalidat akí, ku segun su persona, a kondusí na añanan di tapa por ehèmpel mal uso seksual. El a intensivá e derecho di misa, a trese obispanan for di tur parti di mundu Roma pa un enkuentro tòp tokante mal uso seksual, liñanan di maneho i instituí un komishon spesial pa traha riba prevenshon.

Hopi a kambia, pero ainda hopi ta bai robes. Tin muchu tiki transparensia. Mal usadónan ainda te keda protehá, tambe den e serkania direkto di Franciscus. Ta kompliká pa yama obispanan pa responsabilisá.

E último logro

Kisas sí e parti di mas importante di Franciscus, e

kambio di kultura na e momentu akí ta andando komplete. Na 2021 katólikonan den tur kontinente via di entre otro un enkuesta por a hasi nan remarke kiko misa ta para pa nan na nan kleronan lokal. A elaborá tur e material i aktualmente ta papiando tokante resultadonan.

Finalmente obispanan di henter mundu ta bai den dos reunion, na 2023 i 2024, pa diskutí kua direkshon misa mester bai. Konsientemente Franciscus a pone un proseso sin resultado kla. Mas fuerte ainda, niun hende sa en realidat presis kiko a reunionnan ta kontené.

E papa ke pa misa bini den moveshon, ku kleronan i kreyentenan huntu bai riba e kaminda pa finalmente bini renobashon, pa asina esun ku ta siguié keda guiá riba e bon kaminda.

Fase final

Pasobra despues di dies aña e fase final di e papa tòg realmente ta kaba. Na desèmber Franciscus ta bira 87. Su salú ta bon, ounke ku dor di problema ku rudia kasimente e no por kana mas. Ketu bai e tin molèster ku tripa, dor di kua na 2021 a oper’é. Tambe sigur el a baha 20 kilo.

Pero di renunsia e no ke tende. Un Papa mester keda sinta te na su morto, asina el a agregá e siman akí: “Te na momentu ku mi ta spiritualmente i korporalmente muchu kansá.”

Kansá e ta mustra por lo ménos, mirando ku el a hasi 40 biahe e último dies aña, entre otro na Mongolia i India. Sí mester den ròlstul, meskos ku el a hasi na Canada i Repùblika Demokrátiko i Sur Sudan.

“Goberná bo no ta hasi ku bo rudia, pero ku bo kabes,” Papa a bisa den chansa. Por lo pronto Franciscus pues ta sigui normal ku ánimo.

Preparando pa ‘Dia di Aruba’

Dia 18 di mart awor ta selebrá ‘Dia di Aruba’. Den kuadro di selebrashonnan ku tin planeá e fin di siman akí, a pone e sitio na unda e busto di Betico Croes ta situá den kondishon, haciendo limpiesa.



NA KAMINDA PA ELEKSHON

Analisis di kristian David Frans:

MPB partido ku más a bai atras

KRALENDIJK — “MPB ta e partido ku más a bai atras den e último 4 añanan”, segun un análisis ku David Frans, kende ta keda insistí ku e ta kristian, a hasi. E ta pretendé di a hasi un análisis basá riba forsa, debilidat, opotunidat i menasa di e partido MPB.

Frans ta trese dilanti ku MPB tin un lista grandi, ku hopi hende nobo, ku atrobe ku Elvis Tjin A Sjoe a logra dominá i engañá. Esnan bieu no t’ei mas. Tur a bai ku hopi sla i debe di kampana anterior.

“Nan programa di kampana ta musta amplio, pero hopi no ta nifiká nesessari-

amente bon. Esaki ta musta nan estilo di marketing sin por kumpli despues ku lokual nan a primintí. Tambe tin desbalanse den e lista, e lista no ta representá e komunidat boneriano, tin ekseso di hende djafó riba e lista, en total 19. Unda e boneriano a keda? Ta kon MPB por representá e hende pover i marginal ku e kandidatonan ei?”, David Frans ta trese dilanti.

Frans: “MPB ta purba haña voto serka hende nobo pa medio di marketing. Mayoria di hende ku vota pa nan, no konosé e berdadero Elvis Tjin A Sjoe. A keda probá kaba ku MPB no por

traha e trabou nesessario den gobernashon. Un ehèmpel: nan miembronan di Eilandsraad no ta bon prepará pero a keda skohé strategikamente komo peonnan pa Elvis Tjin A Sjoe por sigui dominá i disidí. Nan ta su pòpchinan marioneta pa wanta su asientonan, nada mas!” Segun análisis di Frans, e partido MPB ku mas a pèrdè nan kredibilitat serka e boneriano, nan a pèrdè hopi voto te asta miembro interno, manera na presidente i fundadónan di partido. MPB tin kurashi di bisa e lema: “Uní nos ta mas fuerte”! “Nan a kore ku diferente miembro i debí

na e kultura di miedu esakinan no kier bin papia públikamente, pero ta di hùrt i rabiá. MPB no ta uní, nan a pèrdè mas ku 1850 voto den 4 aña, ku ta enserá ku nan t’e partido ku a pèrdè 2.5 asiento promé ku elekshon di 2023. Un gran mayoria di esnan bandoná nan ta afiliá na UPB, pero no kier sali den publisidat debí na e kultura di miedu ku MPB a bin krea den komunidat boneriano. MPB ta e partido mas instabil i suak ku tur ku ta bai elekshon 2023! Alabes serka Gobièrnu Hulandes MPB ta konosí komo ‘Ja-knikker’ ku ta entregando tur Boneiru su

derechonan den man di Hulanda”, segun David Frans.

Frans ta terminá bisando: “Komo un kristian, ami si no tin miedu pa papia bèrdat. Debí ku Elvis Tjin A Sjoe no ta musta sintimentu pa nos doló, e úniko medio pa papia mi doló ta di publik’é pasobra komo kristian nos mester evitá otronan di kai den trampa di e lobo. Te awó ta mas ku 40 lider, inkluso ami mes. Beibel ta siña nos pa papia e bèrdat, pasobra esei ta hasi nos liber. Mi meta ta pa protehá mas lider nobo i votadónan di kai den e mesun trampanan bieu di e lobo Elvis Tjin Asjoe.”

Arthur Sealy:

Kampana elektoral di hipokresia

KRALENDIJK — “Kampana polítiko pa elekshon 2023 ku entrevista tantu na radio, korant, televishon, komo mensahenan riba ret sosial i debate polítiko un tras di otro ku tur lider polítiko den un seshon plenario ta sistemanan ku no ta influensia e votadó pa skohe òf kambia di partido. A base di tur loke mi a tende, skucha i komentarionan mi a konkluí e siguiente. Tabata un kampana di hipokresia.” Esaki komentarista polítiko Arthur Sealy ta trese dilanti den un komunikado di prensa.

Sealy: “E promé echo ta ku Ramoncito ta pone lider polítiko di UPB un banda. Si James no tabata un bon lider dikon ta awor mester kometé e gòlpi di estado

aki. Awor Monchi no por papia mas di su muchanan pero mas bien di su karnénan.”

Otro hipokresia ku Sealy ta mensioná ta e ekspreshon ku “makamba no tin nada di bisa na Bonaire”. Por ta bèrdat, pero pandemia a musta ku makamba/Hulanda ta disidí i ku si Bonlab ta haña kontrato si òf no.

Sealy: “Otro hipokresia, ta Hulanda ta supsidia koriente i no partidonan di koalishon. Mas hipokresia. Apertura di stadion renobá na Rincon a tuma lugá ku plaka di makamba VWS ku a resultá den spònsor kampana di UPB. Presidente di FFB i di UPB sa bon bon ku no por meskla deporte ku política pero esaki a sosodé djabièrnè dies di mart 2023.


Por papia trankilamente di konflikto di interes. Defuntu Aubrey Sealy lo no a laga e kos aki pasa.”

“Otro hipokresia tabata e pregunta di un alumno tokante skrin konsehal riba uso di droga. Interesante. Si e alumno ta kere ku di bèrdat mester skrin konsehal lo ta bon pa eksigí ku ta skrin tur trahadó i alumno di tur sekshon di SGB riba uso di droga i skirbi Grifir un karta i pidi pa skrin tur e konsehalnan ku dreña Konseho Insular despues di elekshon 2023 riba uso di droga. Mi ta ansioso pa tende e reakshonnan.”

Sealy ta konkluí ku e hipokresia mas grandi ta henter e asunto di supsidio pa hür. Votadónan a lubidá rotònde, dam i kareteranan malu.

“Awor ta negoshi lukrativo di ‘volmacht’ tin. Ami ta dispuesto pa duna servi-

sio, inkluso ABB pa vota pa un otro persona.”



NA KAMINDA PA ELEKSHON

Libertat di eskoho den man di e votadó

Pa: Nòchi Willem

KRALENDIJK -- Manera mi a bisa for di tempran, komo siudadano, lo mi duna un konseho di voto na e votadó KON i KIKO e mester evaluá ora di bai vota awe 15 di mart i hasi su eskoho entre e 6 partidonan ku ta partisipá na e elekshon. Pues ku esaki mi ta laga e libertat di eskoho kompletamente den man di e votadó i duna realse na e derecho fundamental di e ser humano pa skohe liber i den sekreto, segun su konsenshi, su 9 representantenan pa e próksimo kuater añanan. Na mi opinion tin tres pregunta simpel ku kada ken di nos por kontestá pa nan mes sin ningun hende mester influensia nan den esaki. I si bo kontestá nan honesto, nan lo ta e bos di bo konsenshi ku lo guiá bo awe pa kua partido i kua kandidato lo

bo depositá bo voto.

Abo komo boneriano ta sinti ku bo a bai dilanti i huntu ku bo famia ta bibando riba un isla ku semper bo a deseá, esta ku trankilidad, ku hendenan amabel ku un ta yuda otro, ku semper a kuida su naturalesa i a balorisá su kultura, ku norma i balornan ku a pone ku e boneriano ta ketu bai tur parti di mundu gabá? Bo ta sinti ku bo tambe ta disfrutá i benefisiá di e desaroyo ku Boneiru ta pasando aden?

Abo komo boneriano ta sinti ku e bario den kual bo ta biba a mehorá pa loke ta su infrastrukutura, su iluminashon, un bon transporte, su seguridat, sufisiente kasnan pagabel, sufisiente rekreashon i sufisiente tereno pa traha kas i su servisionan ku e mester duna i ku a hasi ku bo ta biba agradabel den bo bario so-

sialmente ku tur bo hendenan di bario.

Abo komo boneriano ta sinti ku e relashon ku Hulanda a pone bo identidat, bo kultura, bo naturalesa, bo tradishonnan i kustumbenan asina tantu bou di preshon ku bo ta sinti ku si no hasi algu konkreto, nos lo pèrdè e Boneiru ku nos a konosé i ku nos ta deseá pa ta den futuro? Den e kampaña ku a pasa, riba e tres puntonan akí bo a skucha kon e aktual koalishon a akusá otro di ku esun a stroba otro pa realisá e puntonan akí ku pa mantené e gobièrnu stabil tur e puntonan a keda drumi. Nan tur dos ta splika ku awor sí nan lo bai traha dirigí riba e puntonan kon tal nan haña mandato total, esta 5 asiento.

Den e mesun kampaña ku a pasa bo a skucha e 4

otro partidonan trese dilanti ku ta falta di e aktual goberdashon ku e puntonan mará den e tres preguntanan no a keda realisá i ku nan sí ta bin ku plannan konkreto pa kita e sufrimentu di un gran parti di nos poblashon, di para e baimentu atras di nos barionan i di duna bèk Boneiru loke ta hasi Boneiru úniko den mundu. Nan tur kuater opviamente kier realisá e puntonan aki riba nan so esta ku un mandato total, 5 asiento.

E kontestanan ku bo mes a duna riba kada un di e tres preguntanan simpel akí ta un reflekshon riba e periodo ku a pasa, kompañá ku loke bo a tende, skucha, lesa i mira durante e kampaña di loke nan kier bai hasi. Nan dos huntu ta mas ku sufisi-

ente pa awor bo skucha e bos di bo konsenshi i hasi bo eskoho.

Bo eskoho no solamente ta basá riba atendé ku bo nesidatnan personal, sino e ta tambe pa krea un Boneiru sano i di harmonia pa nos tur por biba na pas ku otro i sigui desaroyá pa krea un futuro sólido pa generashonnan ku ta bin.

Bo eskoho mañan ta pa huntu krea un Boneiru hustu i duradero den balansa, skuchando awor e bos di sufrimentu den silencio, pidiendo pa aktua ku determinashon pa hasi e diferencia den e kuater añanan benidero.

Norwin 'Nòchi' Willem ta hasi un yamada na bo, **HASI BON USO DI BO DERECHO, BAI VOTA.**

David Frans:

MPB a sabotia trabounan di Kroon

KRALENDIJK – Na opinion di David Frans, den pasado kandidato riba lista di MPB, pero awor ku UPB, Elvis Tjin A Sjoie a skohe pa goberná ku James Kroon, ku intenshon di dominá James Kroon i sabotia su trabounan den gobièrnu. “Ami mes ta testigu di akuerdo aki den partido despues di e viktoria na 2019! Kroon humildemente a duna MPB tur chèns pa hasi nan kos, te asta awor nan kier broma ku logronan riba tereno di James Kroon. Tambe nan a usa e strategia pa stroba e portafolio di James Kroon i Patriótiko di funshoná den e gobièrnu. Wak e asuntu ròndu di kaya ku

mester asfaltá, kaminda tin surplus i nan ta manda e sèn Hulanda enbes di sostené James Kroon den su logronan pa asfaltá mas kaminda na Boneiru. Esaki atrobe ta mustra falta di madures di MPB i ta hunga ku responsabilidat di pueblo pasombra ora un gobièrnu sinta no tin nada di aber ku kolo mas pero mester traha na bienestar general di e pueblo.”

Frans: “Elvis Tjin A Sjoie tin un dicho ku e a hòrta fo’i Ramoncito Booi. ‘Nos ta mata e baka, kaba nos ta parti e karni’. Hopi ta e lidernan ku te ainda ta wardando karni di e baka ku ta morto ei, te asta e ta hole! Elvis Tjin A Sjoie su forma di operá

ta dunando lidernan speranza falsu den kampaña, primintí hopi i despues dùmpanan òf pasa otro nan dilanti.”

“Wak e manera ku Sanne Meijer a sali fo’i bòm di lista bai dirigí su ofisina enbes di un boneriano? Esei ta mustra su preferensia pa traha ku makamba? Unda Nina a keda i unda nr. 12, David Frans, a keda? Dikon Din Domacassé a dreña Eilandsraad na lugá di David Frans? Unda e 22 kandidatonan ku a bai 1850 voto a keda? E kontesta ta ku tur e lidernan ku no ta di akuerdo ku su mentiran ta keda rechasa i retirá, sin remordimentu”, segun David Frans.

Plantando bandera

Awe ta dia di elekshon. Despues di hopi trabou, plantando bandera, kore pita outo, awe nochí e resultado lo ta konosí. Foto ta mustra aktivistanan di Demokrat plantando bandera.



Entidat Públiko Boneiru ta yuda soño bira realidat:

Kunukeronan por hasi fianza barata

KRALENDIJK - Di awor en adelanti kunukeronan por hasi fianza barata. Entidat Públiko Boneiru a kuminsá un kolaborashon ku Qredits. Di e manera akí empresarionan den agrikul-

tura posiblemente por haña un fianza di maksimalmente \$100.000,-- kontra un interes di 2%. Qredits ta ofresé fianza komersial na Hulanda i na algun isla karibense den Reino. For di

aña 2015 330 empresario (ku ta kuminsando) a hasi un fianza na Qredits. Esaki a sòru pa 765 kupo di trabou. For di awor empresarionan den agrikultura por registrá na Qredits pa un agro-fian-

sa: un fianza pa kunukero. Mester paga un agro-fianza bèk den maksimalmente 5 aña. Ta bini tambe un 'Agri Business Academy' kaminda kunukeronan por sigui treinen riba tereno di empresariado, inovashon i agrikultura.

'Normalmente fianza komersial tin un interes di 10% òf mas', segun diputado Thielman. 'Ku e kolaborashon akí Entidat Públiko Boneiru ta duna aksesu na finansiamentu. Di e manera akí ta stimulá agrikultura tambe komo un forma pa gana sèn. E programa di gobernashon di e momentu akí ta para pa un Boneiru sostenibel den un ambiente stabil ku ta riku na oportun-

idat. Forsa, identidat, kapasidat i nos propio ambishonnan pa nos isla ta forma e base. Durante e kuater añanan tras di lomba Kolegio Ehekutivo a hasi esfuerso èkstra pa sostené empresariado. Kolegio Ehekutivo ta yuda hende pa kuminsá un empresa den diferente sektor, manera den sektor di agrikultura. 'Hopi biaha kunukeronan tin mester di sosten finansiero', segun Thielman. 'Sèn èkstra pa hasi e empresa mas fuerte, pa kumpra mashin nobo òf pa hasi invershon. Awor akí ku Entidat Públiko Boneiru ta hasi e finansanan mas barata akí posibel, pa hopi kunukero un soño ta bira realidat.'



Tokante maneho di awa

Gezaghebber Rijna ta konsultá ku Minister Harbers

KRALENDIJK -- Si man pasá Gezaghebber Edison Rijna a hasi un bishita di trabou na Den Haag, relashoná ku su funshon di supervisor di órden públiko, siguridat i kombativimentu di kalamidat na Boneiru.

Tópiko di e diferente kòmbersashonnan, entre otro ku Minister di Infrastruktura i Maneho di Awa, Mark Harbers, tabata e rapòrt ku resientemente gobièrnu a risibí tokante

maneho di awa integral.

Ekspertonan bou di guia di Hein Pieper di Waterschap Rijn & IJssel, riba petishon di gezaghebber i despues di a mira e situashon lokal, a hasi algun rekomendashon tokante kua ta e medidanan ku mester tuma pa kombatí molèster di awa i pa evitá daño na naturalesa, teniendo cuenta ku yobida mas pisá komo konsekuensia di kambio di klima. Gezaghebber Rijna a papia ku Minister Har-

bers i su staf tokante medidanan ku ta nesesario pa atendé riba término kòrtiku ku problemanan urgente i tokante kiko ta nesesario riba término mas largu pa strukturalmente yega na un maneho di awa duradero. Pa tur partido ta bon kla ku Boneiru so no por hasi esaki. Riba tereno di maneho di awa, Hulanda ta lider na mundu, pues nos no tin mester di bai buska hopi leu pa haña ekspertisio i sosten na momentu di ehekushon

di e rekomendashonnan, segun gezaghebber Rijna, despues di su bishita na e ofisina prinsipal di Waterschap Rijn & IJssel.

Banda di e enkuentronan akí, Gezaghebber Rijna a hiba kòmbersashon tambe

ku Ministerio di Asuntunan Ekonómiko i Klima i ku 'kwartiermaker' Ed Nijpers, tokante progreso di e mesa di klima pa Boneiru. Ta spera e rapòrt tokante esaki na luna di mei.



Arkitektura straño pa kas



Tin hopi konstrukshon ta tumando lugá na Boneiru. Hopi kas den konstrukshon. Tambe introdukshon di arkitektura nobo, manera e kas riba e foto aki, ku parse un misa. Pero e ta un kas den fase final di konstrukshon.

Mensaje de la Virgen Maria Reina de La Paz desde Medjugorje 25 de FEBRERO de 2023

"Queridos hijos, conviértanse y revístanse de vestiduras penitenciales y de oración personal profunda, y humildemente pidan la paz al Altísimo. En este tiempo de gracia, Satanás quiere seducirlos, pero ustedes, hijitos, miren a mi Hijo y síganlo hacia el Calvario en la renuncia y el ayuno. Estoy con ustedes porque el Altísimo me permite amarlos y conducirlos al gozo del corazón, en la fe que crece en todos los que aman a Dios por encima de todo.

¡Gracias por haber respondido mi llamado!" 02/25

Den kuadro di Bon Doet

Fundashon Kuchara a trata tema Pasado di Sklabitut

KRALENDIJK -- Den kuadro di e di kuater aña partisipando na Bon Doet, Fundashon Kuchara (FK) a skohe un aktivitat sosial ku ta trata e tema, nos pasado di sklabitut. Na promé lugá komo k'e tópickó aki a bini hopi dilanti último,

tantu na nos islanan komo na Hulanda. Na di dos lugá a konstatá ku muchanan sa masha poko di e historia aki.

Djasabra último 11 di mart trempa muchanan ku boluntario a reuní na sede di FK pa inisiá e programa,

Bon Doet 2023 Fundashon Kuchara.

Programa a start ku narashon i video di sr. Bòl Antoin, Rincon di ayera pa awe, ku a kapta atenshon i interes di e muchanan, pero tambe di e adultonan, komo ku FK tabatin entre otro

partisipantenan di Aruba i Hulanda komo boluntario ku a haña esaki masha interesante. Muchanan tabatin oportunidat pa hasi pregunta.

Despues di a desayuná, transporte a yega p'e rekori-do. A pasa na e sitionan históriko pa e muchanan por a eksperensiá momentonan ku antepasadonan a biba e tempu aya. A pasa na Mangazina di Rei i a deskribí tarea ku katibunan tabata hasi i pa despues sali pa Museo Chich'i Tan, kaminda e muchanan a sera konosí ku hopi artefakto ku tabata usa ántes i tambe nan a hasi masha hopi pregunta. Por bisa ku nan a keda impreshoná pa historia di e bario di Rincon i e trato ku katibunanan tabata haña i nan balentia pa por a logra haña nan libertat.

Entusiamo di e muchanan a demonstrá un falta enorme pa e tipo di aktividatnan aki ku FK ta konsiderá komo edukativo pa amplia e konosementu históriko.

E rekorido a kulminá

dunando mas informashon na e kasnan di katibu i salinanan di salu na sùit. E muchanan tabata hopi curioso pa sa hopi mas di e historia i un grupo a drenta den un di e kasnan di katibu pa sa e bèrdat ku por a drumi òf no por a drumi den nan.

FK a keda inspirá p'e programa aki i ker a sugerí gobièrnu i direktiva di skolan pa aserká Bòl Antoin, ku tin un kantidat di buki i hopi otro material ku por duna un gran aporte na konsientisashon históriko. Nos no mester lubidá ku t'esaki t'e fundeshi di patriotismo i solidaridat, balornan ku ta hasi un pueblo fuerte na momentu di tuma desishonnan krusial. FK trahando ku mucha ta realisá ku no tin mihó kaminda pa kuminsá ku no ta na nos muchanan.

Un danki ta bai na tur e boluntarionan ku a duna tur ku tin i ku tambe a keda impreshoná.

FK ke gradisí Tropical Travels/Plaza Resort i gerente di Museo Chich'i Tan pa nan aporte balioso.





Rijksdienst Caribisch Nederland

AWE BO POR VOTA!



Elekshon pa Kolegio Elektoral di Boneiru


Awe tin elekshon pa Konseho Elektoral i pa Konseho Insular. Ta posibel pa vota for di mitar di 8 di mainta te 9 or di anochi na kada lokal di vota na Boneiru:

- | | |
|------------------------------|--|
| 1. Jong Bonaire | 7. Kompleho Deportivo J. Nicolaas |
| 2. Sentro di Bario Tera Kora | 8. Sentro di Bario Nord Salina |
| 3. Lokal Kristu Bon Wardador | 9. Sociedad San Antonio de Padua |
| 4. Sentro di Bario Nikiboko | 10. Tia Sani |
| 5. Sentro di Bario Amboina | 11. Urna Mobil - EEG Boulevard |
| 6. Sporthal Adventista | 12. Edifisio serka i Airport banda di Brantwer |

Si bo por vota pa tur dos elekshon, trese tur dos karchi di vota i entregá nan na e lokal di vota. Tambe, musta bo karchi di identidat. E ora ei bo ta haña dos papel di vota.

Tur **voto** ta konta

Bo ke sa mas? Bishitá www.rijksdienstcn.com/kolegioelektoral2023, óf nos pagina di Facebook 'kiescollege 2023'



CHON THEODORA

#37



#HUNTU

"Huntu nos para na bienestar i siguridat di nos grandinan."

MPB
Movimiento di Pueblo Boneriano

HUBERT VIS

#36



#HUNTU

"Huntu nos traha riba futuro di Boneiru."

MPB
Movimiento di Pueblo Boneriano

Ku e komposishon Seú ta Rei

Luigino `Luis Mokka` den Kantadó Mayó

KRALENDIJK — Luigino `Luis Mokka` awe djáron ta den kontienda pa Kantadó Mayo 2023 na Kòrsou. BONERIANO a hiba kombersashon ku mèneder di Luigi, Clay Davelaar ku a splika di e kantante su partisipashon.

“Ta promé bia ku Luigi ta bai kompetí den Kantadó Mayó. E ta bai ku un komposishon di Rendel Rosalia i areglá pa Christopher Wallé i Rendel Rosalia. Bena Mayó ta agrupashon musikal di Rendel.” E ta sigui splika ku Luigi su partisipashon na Kantadó Mayó a bini for di un kombersashon den pasado. Rosalia a proponé pa e kantante boneriano par-

tisipá den e festival i el a bai di akuerdo. “Mirando kon Luigi su karera ta aktualmente, e partisipashon aki ta hopi importante mirando ku komo artista e ta moviendo den un otro direkshon. Esaki kiermen komo solista i di tin su mes banda,” e mèneder ta sigui splika. Mas aleu e ta indiká ku Luigi ta hopi entusiasma pa ku su partisipashon. Djaluna el a bula pa Kòrsou unda huntu ku e banda nan a ensayá e piesa den su totalidat. Djamars tambe e grupo a práktika huntu i pa awe djáron duna nan presentashon. Kantadó Mayó tin un kantidat di 55 partisipante repartí riba 3 anochi. Djaweps lo saka e final-

istanan pa djasabra anochi.

“Tabata un deseo di Luigi di por a kompetí den

kantadó mayó. Pues ku su partisipashon di awe nochi e ta kumpli ku esaki i al-

abes representá Boneiru,” asina e mèneder a finalisá bisando.





OPENBAAR LICHAAM
BONAIRE



Vacature

*Wees het verschil dat je wilt zien.
Solliciteer nu!*

Afdelingshoofd C/
Kwartiermaker Publieke Gezondheidszorg

Meer informatie?



www.bonairegov.com/bestuur-organisatie/vacatures



OPENBAAR LICHAAM
BONAIRE



Vacature

*Wees het verschil dat je wilt zien.
Solliciteer nu!*

Afdelingshoofd A/
Kwartiermaker Bibliotheek

Meer informatie?



www.bonairegov.com/bestuur-organisatie/vacatures

Spet 46 aña trahando na Cargill


KRALENDIJK -- pa 'Spet di Tera Kòrá', ta Awe e konosido Franklin Pietersz, bon konosí na Cargill Salt. Un persona

ku hopi ánimo, ketu bai e ta na e kompania kaminda semper el a traha. Esaki sigur ta tremendo ehèmpel.

Manera ta tende hendenan komentá, awendia e kosnan ei no ta sosodé mas. Den nòmber di Dios, otro aña Spet ta baha ku penshun, na e momentu ei e tin 47 aña di serviso.

Spet tin awor 61 aña di bida. Kisas tin hende ku mes òf mas tantu aña kuné trahando na mes un kompania, pero esei lo ta algun hende, sí ta asina.

Spet un trahadó balente, ku a kere den para urina un kaminda pa mir'è skuma.



Limpiesa bou di laman

KRALENDIJK – E wikènt ku a pasa tabatin e promé limpiesa bou di laman pa a e aña akí.

Komo parti di Bon Doet, a orga-nisá un limpiesa bou

di Waf Chiku Mercelina i a kolektá un kantidat grandi di liña di piska i un total di 45 kilo di glas.

E organisadónan ta gradisí e boluntarionan i ta

spera di mira nan bèk durante e siguiente akshon. Tambe gradisimentu ta bai na Dive Friends pa e tanki-nan.



MEGA DISCOUNT WEEKS

March 10th - March 22nd

ENJOY DEALS OF

25% OFF OR 50% OFF

SAVE THE DATE

**OPENBAAR LICHAAM
BONAIRE**

Vacature

Wees het verschil dat je wilt zien.
Solliciteer nu!

Directeur Toezicht en Handhaving

Meer informatie?

www.bonairegov.com/bestuur-organisatie/vacatures

**DENNIS
MARTINUS**

#39

#HUNTU

"Huntu nos ta para pa un gobièrnu transparente"

The most complete payroll and HR software in the Caribbean!

Payroll Pro

HRM

www.payrollprohrm.com

Download the mobile app!

Jeanne Goeloe a konfirmá

KRALENDIJK -- Djadumingu 12 di mart ta un dia ku Jeanne Goeloe no por lubidá nunca mas. El a konfirmá na Misa di Coromoto na Antriol.

Pader Marc Hooijschuur

a yama Goeloe dilanti altar durante Santu Sakrifisio di Misa. Ei nan tur kos a tuma lugá, den presensia di parokianonan.

No ta algu ku ta sosodé hopi, esta un adulto ta kon-

firmá. Pa un òf otro motibu el a tuma su desishon awor pa hasié.

Despues ku Goeloe a konfirmá, el a risibí un fuerte aplouso serka parokianonan.



Rijkdienst Caribisch Nederland

AWE BO POR VOTA! Elekshon di Konseho Insular Boneiru.

Bai ku bo karchi di vota i un karchi di identifikashon.

Bai vota awe entre mitar di 8 di mainta i g'or di anochi na un di e urnanan elektoral na Boneiru. Bai ku bo karchi di vota i un karchi di identifikashon, ku riba 16 di mart 2023 no a kaduká mas di 5 aña. Abo mes no ta kapas pa vota? E ora ei bo por pidi un otro persona pa hasi esaki pa bo. Bo kier sa kon ta hasi esei?

Wak riba www.rijksdienstcn.com/elekshondikonsehoinsular
òf riba nos página di Facebook www.facebook.com/IslandCouncilElections

BO KE NOS ISLA SIGUI FLORESÉ? BAI VOTA!

Elekshon pa Konseho Insular 2023

WILSON
FRANS
#35

#HUNTU

"Huntu nos tur vota pa MPB pa asina e trabounan por sigui kana."



Nos ta buskando un full time
Schoonheidsspecialist



Eksigensha:

- Mester tin 3 aña eksperensha ku servisionan di schoonheidstherapie
- Mester ta un personal amabel i servisial
- Por komunika bon, ta profeshonal i fleksibel
- Mester por papia Spaño i Ingles (basiko)

Manda bo CV via: pedisa.spa@gmail.com

Pa mas informashon tokante di e vakatura yama: 0599 7174111

DEN PASONAN DI BÒI

E rúbrika aki no ta kos di tur dia den BONERIA-NO. Ta ora mi tin tempu, gana i tópiko pa skirbi ariba e ta sali. E tres elementonan aki ta hunga un ròl den salimentu di e rúbrika aki. E ta mas tantu un kos pa tene mi okupá, pa no lubidá e arte di skirbimentu. Tene tambe e dedenan fleksibel. Tene e tinu bei, purba pa no kai den ripitishon.

Despues di basta tem-
pu m'a haña kontakto
atrobe ku Roy Balen-
tien. El a app mi djal-
na anochi fo'i Hulanda,
na unda e ta bibando
pa hopi aña kaba. Mas
tempran e anochi ei,
banda di e bar chines
na Mentor, m'a topa ku
Farouk, un dje yunan di
mi amigu. M'a pidié pa
pidi su tata tuma kon-

takto ku mi, loke el a hasi
tambe.

Masoménos un ora
despues (mardugá na
Hulanda) mi ta haña un
app for di un number di
telefòn hulandes. M'a
pensa mesora ku ta Roy.
"Bonochi Boy is het alles
goed? Mi ju a dunami
Boy su number nèt."



*Franklin mi yu mayó huntú ku Roy. Un fli ku Roy a
yega di traha p'e a kibra liña na Belnem i bai kai den
laman. Franklin a kuminsá yora i bisa: "Mi fli a hoga."
Roy a traha un otro p'e.*



Regalu ku mi a haña den pasado serka Roy.

Pues tabata Roy enbèr-
dat. Djis despues ku e
app a drenta mi a yam'é.

Roy Pretu, manera nan
ta yam'é den Rincon, no
semper tabata 'bon mu-
cha'. No ta kita ku sem-
per e tabata i ta ún di mi
mihó amigunan. Mi sa ku
tra'i mi lomba hopi hen-
de tabata kuestioná nos
amistat. Ku mi ta tene
man kuné. Pero nunca
niun hende a demonstrá
kurashi pa bisa mi esaki
den mi kara. Tra'i mi lom-
ba sí, manera ta sosodé
demasiado hopi riba nos
'dushi Boneiru'.

Di mes nunca m'a sos-
tené e akshonnan di Roy.
Mi a trata di yud'é di tur
manera posibel. Dun'é
trabou, buska trabou p'e,
trata na gui'é. E tabata
lanta i kai. Awor, segun el
a splika mi, e ta 'clean'.
No por otro tampoko, mi-
rando su edat i kuantu

kos el a pasa'den. E ta
luchando ku su salú. El
a haña un kas na Rot-
terdam, na unda e so ta
biba. El a invitá mi pa bin
hospedá algun dia serka
dje, loke mi tin gana di
hasi. "Ya bo ta skirbi un
buki di mi bida."

Roy no ta solamente mi
amigu, sino mi ruman,
mi yu, mi hende di konfi-
ansa. Mihó un Roy komo
amigu ku e 'rikunan', ku
a kuestioná mi amistat
kuné. Nunca m'a laga
Roy kai i nunca lo mi
lag'é kai tampoko. Mi
amigunan real no ta es-
nan ku ta sinti nan mes
superior, komersiante i
polítikonan ku ta buska
mi amistat. Mi no ta hinká
den otro asina.

Mi yunan a lanta ku Roy,
spesialmente Franklin,
mi yu mayó. Pero Roy a
move un tiki ku Daniel-
son tambe. Shirley tam-
be, nan mama, tabatin



tur konfiansa den Roy.
Mi tabata laga Roy so
na nos kas. Tin bes e
tabata asta kushiná. E
tabata atendé hopi bon
ku Franklin, manera un
tata, traha fli p'e i siñ'é
lapi tayer di baikel,
hunga bala kuné etc. El
a konosé Sebel tambe
komo beibi.

E regalu (material) di
mas balioso ku m'a risi-
bí den mi bida tabata di
Roy. Un boto di maso-
ménos un meter i mei
trahá kompletamente di
pal'i fofo (lusafè). El a
krea e 'obra' aki durante
un di su estadianan den
prison. Dianan largu el
a traha riba dje. Dia el a
entregá mi e boto aki el
a bisa mi ku, pegando
e palu di lusafènan na
otro e tabata kòrda riba
mi konsehonan, riba e
guia ku mi a dun'é sem-
per. Mi hemut a yena e
dia ei!

MONCHI & TONCHI

Tonchi, awe ta e dia. Bo
ta kla p'e?

Awèl si, awe ta Sinó fono.
Nami gloria mi kurpa promé
nos sali kas.



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com
avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Partner na Aruba
Awe Mainta
Partner na Kòrsou
Extra
Partner na Boneiru
Live99

Redakshon
Papi Antoin
Nathaly
Evertsz-Ipcedencia
Davienuska Janga
Velli Gijsbertha
Edson Pietersz
Ibi Piar (deporte)

Layout
Davienuska Janga
Maya Beaumont

Konsehero:
Bòi Antoin
786-6818
Aviso
avisobon@gmail.com

Parlamento a reuní riba impuesto i kombustibel

WILLEMSTAD-- Djaluna 13 di mart, miembran di Parlamento a bin huntu den un Reunion Públiko pa trata karta di Minister di Finansa enkuanto

Proyekto di Lei pa kambio di e Lei di impuesto riba ganashi 1940 i Eskrito kambio di tarifa di impuesto riba ganashi. Alabes a trata punto

3 riba agènda, kual tabata deliberashon ku Minister di Finansa sr. Javier Silva i Minister di Desaroyo Ekonómiko sr. Ruisandro Cijntje, relashoná ku ter-

minashon di e "Eskrito pa mitigá preisnan di kombustibel temporalmente". Ta trata aki di dos "aanschrijving" den kual Gobièrnu ta pidi Parlamento su aprobashon pa kuminsá ehekutá sierto tarifa di impuesto pendiente e kambio di e ordenansa.

Di e forma aki Gobièrnu por adaptá su maneho miéntras ta spera pa e trayektonan di lei sigui kana nan

kaminda.

Parlamento no a yega na un konklushon riba ningun di e puntonan aki.

Durante tratamentu di e punto aki, a bin ku un 'Proposishon di Òrdu' pa pidi presensia di Minister Presidente sr. Gilmar Pisas den sala di Parlamento. Presidente di Parlamento sra. Charetti America-Francisca a skòrs e reunion te un próksimo aviso.



Sentensia den kaso di kasino

WILLEMSTAD-- Dos partisipante di wega di plaka den kasino online (ku ta operá bou di 'lisensia' di titularnan ku sede na Kòrsou) ta afirmá ku nan no a risibí e premio ku nan a gana. Ambos a transferí nan kehonan na un fundashon ku ta representá interes di víktima di wega di plaka online. Na nòmber di e partisipantenan aki, e fundashon a reklamá e premio di (1) portadó di pèrmit na Kòrsou, (2) portadó di kargadó di pèrmit i (3) e kasino online den kua e partisipantenan a hunga. Durante e prosedura, un di e partisipantenan a risibí sèn di e premio, miéntras e otro partisipante ainda ta warda riba pago. E pregunta prinsipal ta ku por pone doño di e lisensia responsabel pa paga e premio di plaka, si e kasinonan online no hasi esaki.

Den sentensia di 8 di novèmber 2021 Korte su

kontesta tabata negativo riba e asunto aki. Korte a asigná reklamo di e fundashon riba e kasino. Den apelashon, e fundashon a presentá na korte ku e desishon pa no kondená e doño di e pèrmit i su direktor pa paga e sèn di e premio.

Korte di Hustisia Komun a yega na un desishon diferente for di Korte di promé instansia. Ademas di e kasino online, e tribunal ta konsiderá tambe ku doño di e lisensia ta responsabel pa paga e sèn di premio.

Un motibu importante pa esaki ta ku e doño di e

pèrmit tin un deber spesial di kuido. E kargadó di lisensia mester sigurá ku e sèn di e premio ganá ta wòrdu pagá dor di su portadónan di lisensia; esaki ta sali for di e sistema di lei. Si e no hasi esei, e doño di e pèrmit ta benefisiá di e fayó di e kasinonan online. Ademas, por mira e kasino online komo un persona ouksiliar di e doño di e lisensia. E keho kontra e administradó di e doño di e pèrmit ta wòrdu rechasá. No por kulp'e severamente pa akshonnan di e kompania



Detenshon pa menasa

WILLEMSTAD-- Djadumingu 12 di mart 2023 alrededor di 20.30'or di anochi, sentral di polis a dirigí un unidat polisial na Kaminda Turkuas. Un hòmer lo mester a menasá su mama. Na yegada di e unidat polisial a topa ku un señora ku a deklará na polis ku despues di un diskushon un ratu promé

su yu lo a menas'é ku kuchú.

Na e sitio a detené e hòmer sospechoso M.L.S., nasé na Kòrsou di 62 aña di edat.

A presentá e sospechoso dilanti un fiskal ouksiliar ku despues di interrogashon a ordená su enkarselamentu pendiente di mas investigashon.

Kaso di tiramentu ku herido

WILLEMSTAD-- Djadumingu 12 di mart 2023 alrededor di 15.42'or di atardi, sentral di polis a risibí informashon di un kaso di tiramentu ku a tuma lugá na Punta Cardonweg.

A dirigí un unidat polisial na e sitio i na yegada no a enkontrá e víktima ni e sospechoso. Na e sitio polis a komprondé ku a transportá e víktima den

un vehíkulo privá CMC.

Kontinuando ku e investigashon polis a komprondé ku un vehíkulo a kore yega na e sitio i un hòmer sospechoso mester a baha i a start un diskushon ku e víktima pa despues e sospechoso a los algun tiru dirigí riba e víktima. Kousa di e tiramentu te ainda no ta konosí i investigashon den e kaso aki ta kontinuá.

ARUBA

Reapertura frontera cu Venezuela a move hopi comerciante

ORANJESTAD -- For di momento cu a wordo anuncia cu Aruba lo habri frontera bek cu Venezuela, tin un serie di desaroyo comercial a inicia y cu ta expandiendo su mes pa algun siman caba. Mientras cu ainda no por biaha pa Venezuela te ora cu e apertura bira oficial, por compronde cu varios comerciante a biaha via di Colombia of Panama pa Caracas y otro ciudadnan pa atende cu

proyectonan comercial den futuro.

Varios compania grandi local a dicidi cu nan lo busca pa importa mas tanto cu por for di Venezuela asina cu esaki ta permisibel y nan lo kier yega na acuerdonan fiho cu companianan Venezolano prome cu otronan tambe bay busca esaki.

Fuera di bishita na Caracas pa atende cu comerciantenan Venezolano, ta buscando tambe contacto

cu algun fabrica Venezolano cu a cuminsa funciona bek despues di a keda algun aña cera y caminda e intencion ta pa bira representante di cierto productonan cu lo wordo importa aki na Aruba.

Henter e desaroyo aki tambe lo percura pa mas actividad comercial via di Colombia y den fin di siman tres comerciante local tabata na Riohacha tratando di negocia diferente

asunto relaciona cu compra y transporte di mercancia Colombiano via di teritorio Venezolano.

Siman cu a pasa varios comerciante a reuni cu autoridadnan na estado Falcon, entre otro na Punto Fijo y Coro pa atende diferente asunto legal manera permiso y otro documentonan cu ta necesario y pa mira si tin cambio den henter e proceso legal cu nan tin cu pasa aden pa trece mercancia y

comestibel for di e teritorio Venezolano.

Te ainda reapertura di frontera cu Venezuela ta anuncia pa inicio di luna di April y pa e tempo aki comerciantenan local of nan representantenan, a biaha via di otro paisnan pa teritorio Venezolano pa regla tur loke tin cu wordo regla pa asina cu e reapertura bira realidad tur cos ta cla pa importa productonan for di e mercado Venezolano.

Aruba Doet a kibra record atrobe!

ORANJESTAD -- Un otro exitoso weekend unda boluntarismo a demostra con grandi nos Isla ta den yuda, crea y stimacion cu tin pa bo prohimo. Diabierna mainta tempran Aruba Doet a cuminsa hunto cu gobernador di Aruba, su excelencia Alfonso Boek-

houdt, director di CEDE Aruba sr Daniel Tecklenborg y organisador di Aruba Doet, señora Paulien ter Meulen.

Gobernador di Aruba Alfonso Boekhoudt a marca e inicio oficial di Aruba Doet diabierna mainta unda el a duna di conoce cu pe-

ta un honor pa por a scoge YMCA San Nicolaas paso ta hopi sodo y bunita recuerdo tin di dje riba e veld di basketball. Ta aki el a hunga y train basketball den su hubentud. E ta contento cu e por duna bek awo durante Aruba Doet hunto cu su team di kabinet na YMCA.

Simbolicamente DOETI a entrega un roller pa verf na gobernador pa asina e lora manga y cuminsa verf e gang di e edificio.

E proyecto di YMCA tawata 1 di e 190 proyecto cu a tuma luga e fin di siman pasa. Casi 4.000 boluntario a duna un man den diferente proyecto rond di henter nos isla. Bunita pa remarca ta cu tin companianan cu un bes mas a duna nan personeel e oportunidad pa haci trabou boluntario y ta gradici nan tambe pa e oportunidad aki.

Un ehempel sigur ta

difederacion di baseball cu a para weganan pa asina duna oportunidad na clubnan participa riba nan tereno. Esaki a sosode cu mas deporte. Aruba Doet ta un iniciativa di CEDE Aruba den cooperacion cu Oranje Fonds, unda organisacionnan social y boluntarianan ta bini hunto pa haci trabou pa of actividadnan social cu un grupo di interes.

Aruba Doet kier a gradici tur cu a forma parti den e 11 edicion aki y ta preparando caba pa otro aña



Tereno na Savaneta lo keda publico

ORANJESTAD --

landa. Departamento di Infraestructura y Planning DIP, ta informa e comunidad di Savaneta tocante di e tereno cu un pier entre antes Brisas del Mar y un cas di famia. DIP ta informa cu no tin ningun motivo pa preocupacion pa cu acceso na e tereno aki y e pier cu ta wordo uza pa piscado y famianan pa

landa.

E tereno aki ta di Gobierno y ta disponibel pa e comunidad di Savaneta y bisindario. Ademas no tin ningun peticion andando pa haci e tereno erfpacht tampoco y si tin mes e lo no wordo otorga. Pues tanto e tereno como e pier tin acceso liber pa publico y e lo keda asina tambe.

Despues di insidente di gans

Miembronan di Vindicat menasá

GRONINGEN – Miembronan di e organisashon di studiante, Vindicat, di e kas di studiante na Groningen kaminda djasabra a salba dos gans, debí na menasa di morto a keda hiba otro kaminda. E organisashon ta laga sa ku desde di e insidente nan mes tambe a haña menasa di morto.

Rector Adriaan Zoetmulder di Vindicat, a bisa RTV Noord, ta trata di tantu e-mail komo yamada di telefòn ku a dreña serka e

organisashon di studiante. Sinembargo ta trata di mensahe hopi menasante. Pa esaki nos a tuma kontakto ku polis.

Tokante e menasan, Zoetmulder no ke a bai mas aleu den detaye, pero el a bisa ku el a spanta hopi.

E siman ku a pasa e kaso a sali na kla despues ku un foto a dreña na e site di notisia di Groningen, Sikkom, di un kamber di studiante ku un krus di hak grandi riba muraya i un gans di-

lanti bentana.

Momentu ku trahadónan di ambulans di bestia a mira e foto, mesora nan a kai na e kas i a bai ku e gansnan. Segun ambulans di bestia, e gansnan tabata hopi spantá i tabatin pluma ku dañu.

Vindicat ta lamentá e insidente i a laga sa ku esaki no a tuma lugá desde di e organisashon. E miembronan di Vindicat ku ta biba den e kas, a keda suspendé dor di e organisashon di studiante.



Apsolushon pa sospechosonan di teror

SCHIPHOL – Korte na Schiphol a absolvé tur e nuebe sospechosonan ku tabata sospechá di preparashon di un atake terorismo. Ministerio Públiko a eksigí un kastigu di prizòn di res-

pektivamente tres i kuater aña kontra e dos sospechosonan, pero Hues no a bai di akuerdo ku esaki. Segun Korte, no ta pruebá ku nan a kometé un echo kastigabel.

A detené e nuebe hòmbènan, entre 18 pa 32 aña,

na sèptèmber 2021. Nan a topa otro den un garashi na Eindhoven, kaminda durante lockdown di Corona tabata hasi deporte huntu. Segun Ministerio Públiko, nan tabata trein tambe pa un atake terorismo. Ounke ku e hòmbènan no a hasi plan avansá pa un atake asina i no tabatin arma, nan detenshon ta nifiká sí ku nan tabata un menasa, Fiskal a bisa. Segun Ministerio Públiko, e hòmbènan tabata papia bou di otro tokante entre otro matamentu di Mark Rutte i Geert Wilders.



Kompania di awa ta stòp ku uso di awa di Maas

LIMBURG – E kompania di produkshon di awa, Dunea, por lo pronto ta stòp ku produkshon di awa for di Maas. E wikènt ku a pasa e kompania a tuma e desishon pasobra den e awa di e riu a topa ku un parti di sushi di un medio di kombatimentu di yerba.

Segun e kompania di awa, ku ta aktivo den e parti wèst di Zuid-Holland, mas di un mion kliente ta bai keda sin awa. Pa awa di bebe Dunea a pasa pa awa for di Lek. Relashoná ku es-

aki, a hasi un midimentu na Limburg, pegá ku e frontera di Bélgika. Ei nan a topa ku e medio di kombatimentu di yerba tebutylazine den awa. Ta usa e materia den kultivo di maishi i ta dañino pa por ehèmpel piská i mata di awa.

Segun Dunea, e paro ta un medida di prekoushon. E materia no ta disolvé bon den awa i lo por ta ainda presente den e riu. Un boso a bisa Omroep West ku hendenan no mester ta preokupá.



Pa promé biá

Sentensia pa kita kondon durante sèks

DORDRECHT – Korte na Dordrecht a sentensia un hòmbèr di 28 di Rotterdam ku durante sèks den sekreto a kita su kondon na un kastigu di prizòn

kondishonal di tres luna.

Korte a absolvé e hòmbèr di violashon, pero segun Korte sí el a hasi su mes kulpabel na preshon. A pone preshon riba e vík-

tima pa laga penetr'é sin medio di prekoushon.

Esaki ta promé biá ku Korte Hulandes ta dikta sentensia pa e tipo di kaso akí. No tin nada den lei, pues kita kondon sekreto mes no ta kastigabel. Den otro paisnan, manera Alemanía, Suisa i Nieuw-Zeeland, sí esaki ta e kaso.

Korte a sentensia e hòmbèr di a hasi mal uso di e konfiansa ku su partner di kama a pone den dje.



Josan Bonaire N.V.

ta buska

- 1 lasser

- 5 timmerman

-mester tin 2 aña di eksperensia

Mas inf. tel. nr **717-7672**

STATIA/SABA/ST. MAARTEN

Despues di mas di tres dékada

Hulanda ta repatriá restu humano indígino

ORANJESTAD (EUX) – E loke a sobra di nuebe hende indígino ku a manda Hulanda despues di un investigashon arkeológiko mas ku 30 aña pasá, a keda repatriá pa Statia. Durante kobamentu na aña 1094 i

1989 na F.D Roosevelt Airport dor di arkeólogo Aad Versteeg komo parti di un proyekto di investigashon di Archaeological Centre di Universitat di Leiden na Hulanda i Archaeological-Anthropological Institute

di Antia Hulandes na Kòrsou, a haña fragmentonan di wesu, huntu ku otro artefaktonan.

E proyekto a investigá diferente sitio arkeológiko na islanan ariba, partikularmente Statia i Saba, pa haña

un bista di e manera di biba i patronchi di organisashon di habitantenan indígino di e islanan den e periodo pre Columbus.

Kasi tur material ku a haña, inkluso artefaktonan di siglo 5, a keda mandá Hulanda. A publiká resultado di e investigashon na 1992 den e publikashon ‘The Archaeology of Sint Eustatius. The Golden Rock’. Awor, despues di un proseso di hopi aña, loke a inklui diskushonnan entre outoridatnan na Statia i Hulandes, e loke a sobra di e kurpanan ta bèk riba e isla. Statia Cultural Heritage Implementation Committee lo konsultá ku residentenan riba entiero, Nasha Radjouki, e manager di programa pa kultura di Gobièrnu di Statia, a bisa.

“Ta imperativo ku nos ta enbolbí e komunidad di Statia komo ku nos ta konsiderá entiero di e lokenan humano ku a sobra na un manera respetuoso, Radjouki a enfatisá. E komunidad di Statia mester sa ku tin mas historia ku djis solamente loke tin skirbí i ta enbolbí den e narativo nobo.

E akuerdo di transferensia a keda firmá luna pasá dor di Komisario di Gobièrnu Alida Francis, den presensia di Diputadonan Derrick Simmons, Glenville Schmidt, Radjouki i miembronan di e sentro di investigashon arkeológiko di Statia, un organisashon no-gubernamental enbolbí den e estudio di tur aspekto di patrimonio riku i arkeologia diverso di e isla.



Gabinete Rutte: Suficiente prepará pa desaster na Karibe

PHILIPSBURG – Sí akaso e parti karibense di Reino di nobo keda alkansá dor di un desaster natural, Hulanda ta suficientemente prepará pa ofresé ayudo. Esaki Gabinete Rutte a konklui den Konseho di

Minister.

Djabièrnè e gabinete a papia tokante e resultado di e investigashon pa yudansa di rekonstrukshon di Islanan Aruba, despues di orkanan Irma i Maria na 2017. E mensahe di e

investigashon ta positivamente crítico i ta duna di konosé ku BZK a presta relativamente bon apesar di e limitashon di preparashon i eksperensia ku mester kondusí na kordinashon di un krisis di e format akí.

Sinembargo, mehorashonnan ta posibel, segun e gabinete.

Sekretario di Estado, Alexandra van Huffelen, lo informá Tweede Kamer por eskrito kon gobièrnu ta bai duna ehekushon na e reko-

mendashonnan di e investigadónan.

E ministerio di BZK mester determiná ainda mas aleu kua mehorashon por realisá ainda promé ku inisio di e temporada di orkan na yüni.

Workshop maneho rísiko di desaster

PHILIPSBURG – Dianan promé i dos di mart, ekspertonan di maneho di rísiko di desaster di St. Maarten, St. Eustatius i Saba, a bini huntu na St.

Maarten, pa diskutí e konsekuensianan riba término kòrtiku i largu di desaster manera orkan Irma i pandemia di Covid-19 den Karibe.

E enkuentro tabata organisá pa Krus Kòrá di Hulandes, KNMI i Universitat Twente i ta parti di e

proyekto di fondo di Union Europeo, PARATUS, pa promové preparashon pa desaster i resiliensia di sos-

ten na partnernan pa maneho i e rísiko sistemátiko di desaster.



Shete pa dies di aprel

Forsa King and Queen of the Caribbean

KRALENDIJK--Forsa King of the Caribbean Freestyle windsurfevent 2023 den luna di aprel.

Un invitashon pa konferensia di prensa a yega serka nos, esaki pa “Forsa

King and Queen of the Caribbean – Freestyle windsurfevent 2023”.

Forsa King and Queen of the Caribbean – Freestyle windsurfevent 2023 ta tuma lugá e aña aki di 7 pa

10 di aprel 2023, di kua lo bai tin un evento magnífico di windsurfing.

Un evento ku enfoka riba e impakto sosial den nos komunidat. Windsurfers (hòmber i muhé) for di diferente isla lo partisipá i muestra nan talento durante e evento aki.

Naturalmente lo bai tin nos profeshonalnan di Boneiru ku tambe lo partisipá i hasi e evento aki unu aun mas inolvidabel.

Aparte di e kompetensia pa nos profeshonalnan, lo bai organisá kompetensia pa nos futuro talentonan tambe.

Durante e evento aki públiko lo haña oportunidat pa por subi un planki di windsurf i konosé e deporte aki mihó.

Aparte di e evento espektakular di kompetensia

liber “freestyle competition”, ke pone atenshon tambe na e aspekto sosial.

Lo hasi esaki dor di involukrá hóben den risiko i personanan femenino ku a eksperensia violensia doméstiko durante e organisashon di e evento deportivo aki.

Ta sùnamamente importante pa por desaroyá e abilidadat personal pa organisá un evento i krea e sintimentu ku NOS ta traha i NOS tin balor.

Sin e eksperensia di NOS ta bai pa e reto huntu lo no tin konekshon na e método di forsa.

Un persona ku por demostrá un desaroyo sosial lo ta un ehèmpel den nos komunidat kon nos komportashon i aktitut mester ta. E akademia di FORSA ta traha konhuntamente

ku diferente Spònsor ku lo wòrdu menshoná e dia aki i nan lo duna un man ku e organisashon i implementashon di e evento, planiá den luna di aprel.

E fundashon aki ta pone su mes disponibel pa kasi 10 aña ku nan kontribushon den diferente pais. A yega tempu pa pone Boneiru bria atrobe ku e evento di Windsurf Feestyle nombrá: “King of the Caribbean www.forsakingofthecaribbean.com”

Ku sumo plaser e organisadónan lo ke hasi e evento “Forsa King of the Caribbean” konosí na tur persona.

Pa e motibu aki a organisá un rueda di prensa pa duna mas informashon tokante e evento aki.



Ku remodelashon Stadion Antonio Trenidad

Boneiru a kana bai laga hopi pais su tras

KRALENDIJK--Pa loke ta e deporte rei futbòl di nos isla, por sièrto ku bastante aktividat resientemente, den entrevista ku nos tabatin ku e presidente di FFB sr. Luti Balentin, a bisa ku esakinan a bai bon.

Tabatin entre otro e apèrtura di Stadion di Rincon den un bachi nobo.

Tabatin hopi trabou si pa yega eina, e trabounan tabata hopi pero ku satisfakshon a logra yega unda mester a yega ku esakinan.

A logra haña e sèrtifikashon di e stadion, tantu e tereno di wega i tambe e lus di parti FIFA.

Tur ta aprobá pa wegananan internashonal di futbòl riba nos isla pa hunga riba e stadion aki di Rincon. Nos ta riba e bon kaminda, tin bastante kos ku a yega

i keda kla, pero falta mas ainda. Tribunanan tambe a yega kaba, pues e stadion por karga ku kualke wega internashonal segun eksigensianan di Concacaf ò FIFA.

E tribuna tin lugá ku 1300 hende por sinta mira wega. Pa weganan internashonal tur hende mester ta sintá den e stadion, nada di keda para na waya o na muraya.

Tur hende mester sinta.

Tur loke ku mester a yega, tur esakinan a yega. Aworakí ta kaba drecha bar di blòki, WC, tur esakinan ta kedando kla.

E parti pa e hungadónan di resèrva sinta tambe tei kla pa karga 24 hungadó.

A drecha tambe e kamerrinnan manera ta e eksigensianan di Concacaf. E stèlazjenan ku por para riba pa filma manera ta èksigí, esenan tambe tei kla kaba.

Ya a hasi e pruebanan i tur hende ta satisfecho ku esei pa loke ta e transmishon.

E bòrchi skor super modèrno tambe ta kla pero solamente pa falta di problema ku koriente no por a test esaki ainda. Ta trata di un bòrchi úniko.

Den nos area aki di Aruba, Kòrsou i Boneiru e bòrchi aki ta úniko. Ta trata di un bòrchi internashonal.

Nos mester ta mas ku orguyoso di haña aprobashon ò sea sèrtifikashon di e stadion di Rincon pa weganan internashonal.

Pa loke ta e yerba tambe a haña sèrtifikashon komo Yerba FIFA Pro, un di e mihó kalidatnan pa futbòl.

Ku esaki por bisa ku Boneiru ta hopi i muchu mas dilanti ku hopi pais den nos area aki.

Boneiru den esakinan a

kana bai hopi dilanti lagando otro paisnan su tras i nos mester ta mas ku orguyoso di esakinan.

Plei-òf bola 8 ta sigui

KRALENDIJK--Plei-òf kampionato 2022-2023 di biliart bola di nos isla ta sigui mañan djaweps 16 di mart 2023 mitar di ocho anochi den sala di biliart di Kompleho Deportivo Jorge Nicolaas na Kaya Amsterdam.

Pa mañan djaweps ta enfrentá otro e ekiponan Azteca di Nort Saliña i Mastertouch di Kaya Nikiboko Sùit.

E partido aki ta primintí di bira otro tremendo partido di e plei-òf, esaki ku dos tremendo

ekipo buskando e viktoria pa mira kua di nan dos lo baha kabes pa otro.

E partido aki pues ta unu bastante interesante mañan djaweps den oranan di anochi na Kompleho Deportivo Jorge Nicolaas. E ekipo di La Tropicana ta na kabes di e plei-òf.

Abo fanátiko di e deporte di biliart Bola-8 no pèrdè e partido aki mañan djaweps mitar di ocho anochi aya na Kompleho Deportivo Jorge Nicolaas na Kaya Amsterdam.

DEPORTE

Fire Girls kampion

KRALENDIJK -- Fire Girls a resultá kampion di e torneo Crujff Court Meisjes, wega eskolar. Dia 6 di febrüari a kuminsá ku e torneo i terminá dia 13 di mart. Ta trata di 3 tim ku a partisipá na e torneo.

E partidonan a tuma lugá na Kancha Deportivo Sylvio "Chio" Dominico Semeleer. Tur siman taba-

tin 2 enkuentro riba e vèlt. Esaki ta loke Chio Semeleer a informá.

Semeleer a sigui bisa: "Nos ta kontentu ku awe ta final di e torneo. Awor e treinen ta sigui pa kompetí den e weganan eskolar interinsular dianan 21, 22, 23 i 24 di aprel, na Aruba."

Terrence de Jong, hefe di INDEBON a bisa: "Ta

hopi importante pa kombiná skol ku deporte. Por ferwagt mas di e tipo di deporte akí na Boneiru."

E goliadó máksimo a resultá Vurgy-Ann Vissers.

Ta trata di weganan pa hóben ku ta bai skol avansá.

Resultado ta, 3 lugá Atlético VMBO, 2 lugá a bai pa Predetors i kampion a resultá Fire Girls.



Wega deportivo interinsular

Resultado final ahedres

KRALENDIJK – Fin di siman a tuma lugá weganan deportivo interinsular na Boneiru. Pa loke trata dam i ahedres, akí e resultado final di ahedres.

Adriaan Fernandez a hunga un bon torneo i tres

hóben a keda na di promé lugá ku shete punto. Ku e sistema Sonneborn a kita e desempate. Aki den ta Adriaan Fernandez a resultá ku 25 punto i a titulá kampion di e hobensitonan.

Den e grupo di e dami-

tan, tambe tabatin un resultado pèrtá entre Sylvi Cabral i Daphne Smeets, despues ku nan a empatá ku otro. Ora a konta e punto di Sonneborn, Daphne Smeets a resultá ku 29,75 punto i ta titulá kampion di e dami-

tan. Asina akí klup di ahedres a keda sumamente kontentu ku ta promé biá ku ta skor dos kampion, den

tur dos kategoria.

Tambe BJSC a premia e hóbennan ku pa algu chikí no a logra kai den premio.



OPENBAAR LICHAAM
BONAIRE



Vacature

Wees het verschil dat je wilt zien.
Solliciteer nu!

Afdelingshoofd A/
Kwartiermaker SKAL

Meer informatie?



www.bonairegov.com/bestuur-organisatie/vacatures

Pakus di Pruga mester di lokalidat nobo

KRALENDIJK – Despues di añanan di akomodashon grátis, danki na e generosidat di e doño di kas, desafortunadamente dentro di dos luna lo basha e edifisio abou den kua Asilo di Bestia ta tene su marshe semanal i Pakus di Pruga lo keda sin kas.

Kualke persona ku tin espasio pa ofresé Pakus di Pruga, òf tin idea òf sugerensia, gustosamente Asilo di Bestia ke tende di nan. Manda un mail pa paulenamina@gmail.com

Pakus di Pruga tin dos funshon importante pa komunidat.

Primeramente tur artíkulo ta donashon i dor di bende esakinan ta yuda paga pa kuido di animalnan indeseá riba e isla. E fondo akí ta keda laga e asilo funshoná.

Na di dos lugá, ta bende artíkulonnan for di muebel i tur kos na preis abou, pa benefisiá esnan ku semper no por paga e preis haltu pa biba. Tambe pa e artíkulonnan bon akí no bai resultá na Landfill.

Por favor yuda Asilo di Bestia ku un kas nobo pa Pakus di Pruga, pa asina shon importante akí dentro di e komunidat.

RODRI MARTES #32

#HUNTU

"Huntu nos logra pa keda suidatano tin akoso na tur servisio ku gobièrnu tin pa ofresé."

MPB
Movimiento di Pueblo Bonaireño

NOTICE TO VACATE

Pakus Di Pruga

PLEASE HELP US FIND

A NEW HOME!!

3030 YEARS PRIZES

City Shop ta hasi aña y nos lo selebrá na GRANDI!

30 AÑA - 30 PREMIO

- Hasi un kompra di \$50 bai ariba.
- Scan e kódigo QR aki ku bo telefòn.
- Yena e formulario.

Bo ta partisipando!

Bishita nos página di Facebook i haña mas informashon tokante e konkurso aki.

1st Prize: A Changan CS15 2023!

Smart shopping • Better living

/CityShopBonaire